

Uunga siunnersuut: Sukisaarsaatigalugu aalisartitsisarnermut akuersissuteqartarneq pillugu Inatsisartut inatsisaat

Saqqummiussissutissaq

(Aalisarnermut, Piniarnermut Nunalerinermullu Naalakkersuisoq)

1. suliarinnineq.

Egalunnit isumalluutigisanit inuiaqatigiit aningaasaqarniarnerannut Kalaallit Nunaata annertunerusumik iluanaaruteqarsinnaanissaa pillugu ukiorpaalunni eqqartuisoqartarsimavoq tamatumalu ilaatigut kinguneraa pisuussutinik uumassusilinnik Nalilimmik pilersitsinissamut Suleqatigiinnik pilersitsineq.

Suleqatigiisitaq qulaani eqqaaneqartoq 2009-mi martsimi inaarutaasumik nalunaarusiaminik saqqummiussivoq nalunaarusiamilu tassani sukisaarsaatigalugu aalisartitsisarnerup iluani akuersissuteqartarnermik aqqissuussinermut assingusumik eqqussisoqarnissaa siunnersuutigineqarpoq.

Nunanut allanut qiviassagaanni takuneqarsinnaavoq, nunat Kalaallit Nunaata sanilliussinaasaasa sukisaarsaatigalugu aalisartitsisarnermik takornariartitsisarnerup iluani annertuumik kaaviiartitsisarnermik angusaqartartut. Kalaallit Nunaanittaaq piffinni arlalinni takornariartitsisarnerup iluani pitsaasumik ineriartorneqarsimavoq, tassanilu nunanit allaneersunit sukisaarsaatigalugu aalisariarlutik takornariartartunut eqalunnik sukisaarsaatigalugu aalisartitsisarnermik aqqissuisoqartarpoq.

Kalaallit nunaanni takornariartitsisarnerup immikkoortortaanut pingaarnermut eqalunnik sukisaarsaatigalugu aalisartarnermik imaqartup pitsaanagerusunik killilersuutissaanik takornariartitsinermik inuussutissarsiuteqartut piffissami annertuumi ujartuisimapput. Nunanit allanit sukisaarsaatigalugu aalisariarlutik takornariartartut kuummut tikikkunik sukisaarsaatigalugu aalisariarlutik takornariartartut allat tamarmik aalisarfigisinnaagaat takugunikku, Kalaallit Nunaata sukisaarsaatigalugu aalisartarfittut ornittakkatut tusaamaneqaassutaanut ajoqusiissasoq, ta-kornariartitsisarnermik inuussutissarsiuteqartut pingaarnertut tikkuarsimavaat.

Inatsimmut siunnersuummik matuminnga periarfissaqalissaaq, kuunni toqqakkani ikittuni, ikittuinnarnut tunngasumik sukisaarsaatigalugu aalisarsinnaanermik neqerooruteqarnikkut, aammalu ataasiinnarmik akuersissumik piginnittoqarnikkut nunanit allanit takornariat sorliit

kuummut aalisariarlutik takornariartarnissaannik aqutsilluarsinnaanerulissallutik. Taamaasilluni nunanit allanit sukisaarsaatigalugu aalisariartartut ikittuinnaat immikkut ittumik aalisarnikkut misigisaqarnissaminnut periarfissinneqassapput.

Anguniagaasoq tassa, siunissaq ungasinnerusoq isigalugu inatsit una alloriarnerussasoq siuleq, taamaasilluni takornariartitsisartut nammineq najukkami najugaqavissut nammineq najukkami sukisaarsaatigalugu aalisarnermik takornariartitsinerup iluani kaaviiartitsinermik suliffissaqartitsinermillu malunnaatilimmik pilersitsissasut.

Innuttaasut Kalaallit Nunaanni najugaqavissut eqalunniartarnerat eqqarsaatigalugu inatsimmit saqqummiunneqartumit eqqorneqarunnangillat. Inuit kikkulluunniit Kalaallit Nunaanni najugaqartut nunatta kuuini tamani manna tikillugu soorunami aalisarnermik killilersuinerit sior-natigulli atuuttut naapertorlugit aalisarsinnaatitaapput.

Inatsimmut siunnersuummik matuminnga killilersuutinut piumasaqaatinik pitsaanerusunik pilersitsinissaq kissaatigaara, taamaasilluni siunissami Kalaallit Nunaanni sukisaarsaatigalugu aalisarnermik takornariartitsisarnermik ineriartortitsineq tunngavilersussammagu. Nammineq najugaqarfanni siuariartornissamut suliffissaqarnissamullu periarfissat atorluassallugit inuus-sutissarsiorfiup nammineq aalajangiiffigissavai.

Taama oqarlunga siunnersuut Inatsisartut akuersaartumik suliarinninnissaanut tunniuppara